



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :  Tir Yimym

 tir\_yimym



tir yimym

TAPAK 8

**Myanmar Rohingya kin samatsütsü merangba ken o ICJ-i lapoker**

**Milos Raonic tennis asaya nungi anisungzüker**



VOL. XXIII ISSUE NO. 90 (ADOK 90) DIMAPUR SANGTENNÜ (TUESDAY) AENJETI (JANUARY) 13, 2026

₹ 5.00

## Tenyimi Union Nagaland-i BAN pusemer

Dimapur, January 12, 2026

(TYO): Assam Rifles Training Centre (ARTC)-i Dimapur Airport ali atsünga agia aliba azüngtetjang ta Business Association of Nagaland (BAN)-i takhangba agütsüba pusema nungiter ta Tenyimi Union Nagaland (TUN)-i metetdaksüogo.

BAN-i iba onük ya Ministry of Home Affairs dangi benogo aser tekaratiba nung ARTC belentsü rongshiogo.

Public asoshi lezmüksüba ali tim mesüi atsünga magitsüla aser ARTC-i ali mazüngtettsüba ajanga Dimapur Airport ulushitsü aser renloksüba nung tetsükdaksü ajurur ta TUN-i

ashi.

Nagaland nung commercial airport ka dang alibaji Dimapur Airport lir aser iba ya ya rongsenketzüng, tourism, aser emergency services atema kanga tongtipang lir. Ajisüaka tanga state tem den medemdangra Dimapur Airport ulua meyanglutetba ajanga tetsükdaksü aika ajurur ta TUN-isa metetdaksü.

Anungji Ministry of Home Affairs-i memenui iba tebilemtsü koktettsüla aser public infrastructure atema lezmükba aliji timi amshidakjang ta Tenyimi Union Nagaland-i metetdaksüogo.

## IDPs-i Imphal nung lungkak ait

Imphal, January 12, 2026

(Agencies): Hombarnü Imphal nung internally displaced persons (IDPs) noklang aika aser parnok pusemertemi yimdong nung lungkak aita jaja aser Lok Bhavan (taoba Raj Bhavan) nungpoka atutsü meranga liasü.

Lungkak aitertemi "Response to our December memorandums" tezülubatam amer shilem agi.

Iba sentong ya Coordinating Committee on Manipur Integrity (COCOMI) aser IDPs külemi yaritepa ayongzü.

Iba sentong ya COCOMI convenor Khurajam Athouba lenisüba kübok agi aser parnoki iba ya December 31, 2025 nü Manipur Governor nem memorandum ka agütsüba nung shia lir.

Iba memorandum nung IDPs-i mapang latettsü aser resettlement process sentong yanglur inyaksü shia lir saka tanü lungkak aitertemi sorkari

parnok khuret atema mebilemtsüba aitsüogo.

May 3, 2023 nü kin o kin tsüngda rara adokba ajanga parnoki talidak yutsür aotsüsa aküm anungji resettlement maparen timi inyakang ta IDPs aser lungkak aitertemi takhangba agütsü.

Sorkari December 2025 tashi nung iba mapa inyaksü mapang züngzüka liaka mapa meinyak ta parnokisa ashi.

Tesüiba nung IDPs-i mener lungkak aitogo aser Governor o Chief Secretary dangi teti memoranda yoka nenshiogo, saka sorkar nungi tang tashi telangzüba kecha mali ta lungkak aitertemisa ashi.

Manipur nung IDPs-i temulung masüba onüktem jembiba Governor Ajay Kumar Bhalla-i state nung "buffer zone" kecha mali ta shiogo.

Tanü COCOMI aser IDPs teshimtet nübotem den senden ka amendang Governor Bhalla-i iba osang metetdaksü.

## Telangana nung tsürabur merepranger itasen 10% katizüksü

Hyderabad, January 12, 2026

(Agencies): Sorkar mapa inyaktertemi tsürabur mereprangba atema parnok itasen nung 10% katizüker pei pei tsürabur bank accounts-i yoktsü atema Telangana sorkari ozüng ka yanglutsü.

"Tsüraburtemi parnok jabasotem anema ken o tem benokba ya süoki ia bilemtsüla. Item sorkar mapa inyaktertem tsürabur indang bank accounts-

i itasen 10% yoktsüla" ta Chief Minister A. Revanth Reddy-i Hombarnü ashi.

Tanü persons with disabilities. (PwDs) nem retrofitted motorised vehicles, battery-operated tricycles, battery wheelchairs, laptops, hearing aids, mobile phones aser tanga advanced equipment agütsüba sentong nung CM Reddy-i iba osang metetdaksü.

## Nagaland nung Rs 53.28 crore GST ashikülaka agir ka apu

Dimapur, January 12, 2026

(Agencies): Nagaland nung mining company ana nung director ka Central GST (CGST), Dimapur nung Anti-Evasion kongsangi puogo.

Iba nisung yagi Rs 53.28 crore GST ashikülaka agizükba atema apu ta CGST ketdangsürtemi ashi.

CGST ketdangsürtemi apuba nisung ya Atiqur Rahman Barbhuiya lir. Pa ya Bendangtoshi Mining Pvt Ltd aser Kevitho Mining Pvt Ltd nung director lir.

CGST-i bushisüngdanga arudang iba nisung yagi osetbo

magütsü sernung taila invoicing ajanga input tax credit (ITC) ashikülaka agiba bushiteta liasü.

Iba company anaprong ya coal aser coke shishilembar. GST returns reprangdangba ajanga Bendangtoshi Mining-i Rs 27.52 crore aser Kevitho Mining-i Rs 25.76 crore ITC tim mesüi agizükba nguteta liasü.

Company ana yagi tiyazü nung Rs 53.28 crore agizüka agiba bushisüngdangertemi bushitet.

Company ana yagi khu mebelenaka invoices agütsü aser

e-way bills, transport records aser bank statements amala nüngdakba documents magütsütet.

CGST teloktemi tesem tonga oa bushitepdang parnoki agüja aliba registered business addresses nung company tem lapoka maliasü.

CGST-i CGST Act, 2017 nung Sections 132(1)(b) aser 132(1)(c) kübok Barbhuiya puogo aser GST magütsüba network nung shilem agirtem maitsü putettsü atema maneni bushisüngdang südar ta ketdangsürtemi ashi.

## Meghalaya sorkari Christmas tourism policy tasen ka renemer

Shillong, January 12, 2026

(Agencies): Meghalaya sorkari 'Christmas Tourism Policy' ka renemer aser iba ya state nung lisopur benjungmung ya global attraction ka kümdaktsütsü asoshi lir.

"Iba policy ajanga Christmas aser New Year mapang tourist aika atsür arutsü atema lir aser festive tourism jenjang tajungba kümdaktsütsü" ta Tourism Minister Timothy D. Shira-i ashi.

"Yaküm benjung mongpu kanga takok nguogo aser state

kübok tesem balala nung sentong agiba ajanga nisung aika atsür aru. Meghalaya sorkari tourism projects aser destinations aika renemdar aser iba jagi 2026 küm tourist teimba arutsü imlar" ta pai ashi.

State sorkari policy tasen ajanga Meghalaya ya Christmas benjungmung atema 'top destination' ta züngshiba akangshitsü.

Tourist temi Garo Hills len tenük yoker aser iba nung infrastructure tajungba kümogo. Tesüiba nungbo Garo Hills leni

aotsü kanga tasak liasü saka tangbo melamela senzüteter ta Minister Shira-isa ashi.

Garo Hills nung tourism ajungkettsü atema sorkari road networks aser communication facilities nung temulung agütsür ta paisa ashi.

State sorkarisa homestays yanglutsü nisungtem nem sen zübazüba aputsütsü sentong lir aser iba janga nisungtem anenzüksüba nung timtem ajemtsü aser tourism wadang tajungba akümtsü ta Shira-isa shisem.

## Iran-i kiralongrar anema rarar: Parliament speaker



New Delhi, January 12, 2026

(Agencies): Iranian parliament speaker Mohammad Bagher Ghalibaf-i Hombarnü Tehran nung sorkar pusemba rally ka nung jembidang Iran-i kiralongrar anema rarar ta ashi.

Iran nung hopta ana shi ka sorkar anema lungkak aityonga arur aser sorkari lungkak aitertem apur.

"Iran-i wadang pezüsü nung rarar. Iran-i United States aser Israel anema economic, psychological aser military war rarar aser tanü kiralongrartem anema rarar" ta Ghalibaf-i ashi.

"US President Donald Trump-

i ano onok amaktsü merangra Iran sepaitemi pa dang kodanga mamadoktsüba tansütsü ka sayutsü. Iran linüki kodanga tsükchir nem alizüng metongdaksü" ta Ghalibaf-isa ashi.

Iranian supreme leader Ayatollah Ali Khamenei anema hopta ana shi lungkak aita aruba sülen tensa ajunga azüokogo ta foreign minister Abbas Araghchi-ia ashi.

Trump-i Iran inyaksangshi nung teka idaktsütsü tatemtsü ka agütsütsü atema lungkak aitertemi ozüng alema inyak ta pai ashi.

"Lungkak aitertem aser kiralongrartemi police aser

civilians tepset aser public kiojen raksatsü. Iba kiralongraba rara nung US aser Israel-i teka aiba kulitem aika lir" ta Araghchi-isa ashi.

December 28, 2026 nungi Iran nung nübortemi lungkak aitsü tenzüka liasü. Tang tashi nung nisung 544 tepsetogo aser parnok ya lungkak aiter 496 aser security forces 48 lir ta US nung amenoka aliba human rights news agency kati ashir.

Tang tashi nung sorkari nisung 10,600 jungnüa puogo ta parnoki ashir saka Iran sorkari iba dak sendakba osang metetdaksüi lir.



## MLA Azo-i lanurtem dang ochi mapa inyaktsü ayongzük



MLA Kuzholuzo (Azo) Nienu-i January 12, 2026 nü Phek village nung PCF indang 34 buba mungdang nung jembidang tangokba noksa ka yangi angur.

**Kohima, Aenjeti/January 12 (TYO):** Hombarnü MLA Kuzholuzo (Azo) Nienu-i kaketshir ;enirtem dang ochi nung nokakba lenir, tangatetba tajung aliba lenir aser tashi amshiba lenir masü saka shisa akaba lenir ka-ka asütsü ajungshia liasü.

Phek Village Community Hall nung "Higher & Wiser for a Stronger Tomorrow" omen kübok January 12, 2026 nü Phekmi Collegiate Forum (PCF) 34 buba lokti sendne nung jembidang pai iba tayongzükba ya agüja liasü.

"Tang asenok jenjang dang nungi aseni tenüng tajung yutsüba ya tongtipangba lir. Anungji teti meima, bilemtettsüsa asenoki mapa tajung inyaka yutsütsüla," ta pai ashi.

Aji inyaktsü atema pei atema

aser asen kin atema kisüng masü saka Naga nungger ajungai aginüba ama telemtetba agitsü nüngdaker, ta Azo-i ashi.

Khristan ka asünung, asenoki tashi angaba melen anisüngzük meshimtsüla, tejangraba melen dangar nem akumtsübodaktsüba meshimtsüla, ochi temeden melen 'favouritism' aser 'nepotism' meshimtsüla, ta pai ashi.

"Asenok tebilemba tejangja asütsüla aser aseni tenzükba nübur asoshi ochi agi inyaktsüla."

Tanü aliba asen jenjang ya mashi mapang tembangtsü, saka aseni mapa tajung inyaka yutsüba yabo asenok süra teti alitsü, ta Azo-i ashi.

Sentong nung PCF tir Veshe Chizo-i omen nung kongshia jembidang, "Iba omen yagi

asenok dang kaketshir aser zünga-meteta alir ka-ka ama academic kisüng nung takok angutsü asoshi merangtsüba kisüng masü saka asen tangatetba tejangja, yimya tajung, yimsü aser lokti khuret angatetba nung tera yanger shisa tali asoshi inyaktsüla," ta ashi.

PCF-i shisaluyimba nung kisüng masü saka tanüla, lokti angatetba aser nübur meimba lenirtem adokdaktsüba nung rangloksüla, ta Chizo-i ashi.

Iba sentong nung Chakhesang Public Organization (CPO) tir Vezuhu Keyho aser Phek Village Council chairman Chivozo Soho nungeria o tatsütsü jembia liasü.

PCF tongti zülur Vephiyi Soho-i PCF osang agütsü aser PCF nütsüngsük zülur Krove Hoshi-i nütsüngsük osang agüja liasü.

Tang PCF nung züngsem 2231 lir. PCF joint secretary Nuvevo Venuh-i tenüngsang agütsüba mapang agia liasü, Kho-o H Keyho-i pangzüng lepa reprangshi aser Rev. Vesito Venuh, Pastor, Phek Village Baptist Church ajanga kümsük 2026-28 lenirtem atema sarasademja liasü.

Sentong nung PCF joint secretary Vepo Soho menden liasü aser PCF finance secretary Nukuta Chizo-i melepzüng o jembia liasü.

Veshe Chizo ya PCF tir ka ama 2028 tashi maneni inyaktsü aser Thuputo Venuh tongti zülur asütsü.

## Medziphema nung angati surgical camp ayongzük

**Dimapur, Aenjeti/January 12 (TYO):** MLA, Dr. Tseilhoutuo (Ato) Rhutso-i anir Chief Minister's - Mobile Operation Theatre Camp (CM-MOT) kübok angati surgical camp ka CHC Medziphema nung January 12, 2026 nü agia liasü.

Iba sentong nung MLA aser team leader (CM-MOT) Dr. Tseilhoutuo Rhutso-i o tatsüka jembidang, CM-MOT health Camp indang inyakyim tejangja lemsatepa liasü.

Pai CM-MOT ajanga service agütsüba, mangdang aser nükla rateta ashi, koba Chief Minister Neiphiu Rio küm 25 tashi state lenir ka ama inyaka aruba nüngtem nung

district ajunga atongtsü nükjidong nung Nagaland Angh-i tenzüktsü.

Iba CM-MOT kübok awajemba tesemtem rongnung Medziphema sub-division ya tesem 22 buba lir ta Dr Rhutso-i ashi.

Paisa Medziphema nung aliba nüburtem dang Medziphema nung iba angati health camp nung teyari magiteter temi Dhansiripar, Viswema mesüra Touphema yimtsüngtem nung agitettsü akok ta ashi. MLA Dr Rhutso-i iba service ya card malirtema agitettsü ta ashi.

Iba sentong nung ADC Medziphema, P. James Swu, NCS-ia CM-MOT indang

inyakyim tongmelang agi rateta ashi.

Sentong nung Khrielie Iralu, Chairman HC MC, CHC Medziphema ajanga pela agizükba o jembia aser village council, GBs, tetsür tentet aser nüburtem nungia o tatsütsü jembia liasü.

CM-MOT team nungya doctor aser surgeons pezü - Dr Mao, Dr Lanu, Dr Kenie, Dr Ato, nurses pezü, OT, technicians, drivers aser truck ana nung mozü-moko bona lir.

Iba health camp nung keyhole surgeries, general surgeries, gynaecology, ENT, orthopaedics services tem agütsür, koba January 13, 2026 nü tembangtsü.

## Dhansiripar nung CM-MOT kübok angati surgical camp ayongzüksü

**Dimapur, Aenjeti/January 12 (TYO):** Chief Minister's Mobile Operation Theatre (CM-MOT) kübok angati surgical camp ya Community Health Centre (CHC), Dhansiripar nung January 14 & 15, 2026 anogotem ayongzüksü lir.

Anogo ana nung CM-MOT team ajanga camp ya anepdang 9:30 ako nungi tenzüktsü, ta Office of the Sub-Divisional

Officer (Civil), Dhansiripar sangdong ka ajanga ashi.

Medical camp ya Dr. Tseihoutuo Rhutso-i anir specialist doctor temi agitsü. Dhansiripar Sub-Division aser temeket tesemtem nung aliba nüburtem nung nüngdakba surgical services agütsütsü nükjidong nung iba sentong ya ayongzük, koba ajanga specialised healthcare facilities peria monguteter tali

ajangzüksü.

Iba service agitsü janra aliba shiranger temi item anogotem nung PMJAY aser CMHIS cards densema nüngdakba documents bener arutsüla, ta sangdong ajanga ashi.

Iba dak tali tejangjaba osang aser teyari aginer temi mobile number 9612240346 nung jembitsü akok, ta ashi.

## Nagaland Angh-i Paong Lum benjong salem lemsatep

**Dimapur, Aenjeti/January 12 (TYO):** Chang nungger adianu aser adianutsürtem dangi Poang Lum benjong salem abener, ta Nagaland Angh Ajay Kumar Bhalla-i sangdong ka nung ashi.

Nüburtemi sobaliba tajung amshiba aser telungjem aliba temaitsü ka ama iba benjong ya amunger. Iba ya ajanga

nüburtem tsüngta angatetepa tesunep nung alitsü asoshi shisadangtsü maongka agütsür.

Poang Lum indang tanüla agi tesunep, arogo tejakleni aoba aser asen sobaliba tajung wazüka ayuba nung külemi inyaktsü temulungtetba asendenshidakjangma, ta Angh ajangasa ashi.

## Peshu Students' Union küm 25 jungogo



**Dimapur, Aenjeti/January 12 (TYO):** Peshu Students' Union (PSU) küm 25 ajungba benjongmung sentong January 12, 2026 nü Peshu village, Noklak

nun gaga liasü, kong sentong akhumdong ama Advisor, Youth Resources & Sports aser Chairman DPDB Shamator, S Keoshu Yimkhiung dena liasü.

Advisor, S Keoshu Yimkhiung-i iba sentong nung kaketshir aser nüburtem adenshia alidak jembidang, lanurtemi temang arakzüa mapa inyakba yimya balala nung angazükba indang jembia liasü.

Tangbo saisapong ya pei pelatsü asoshi inyakba mesüra pei jangraba ka ama merepranger, saka professional ka ama kumogo, ta pai ashi aser lanurtem dang pei sempet jangjateta bendanga agütsür item sempet tajungba kumdakja career ka ama lenmang bushitsü ayongzük.

Tanü-asüng sports industry nung maongka jenti lir aser tarutsü nung jangratema alitsü atema lenmang lapoktsütsü, saka lanurtem yimya shidak amshia pei inyakba nung rangloker alitsüla,

ta ashi. DPDB Shamator indang chairman ka ama pai lanurtem ajanga region aintsü nüngdakba indanga lemsatepa liasü.

Pai PSU züngsemtem dang küm 25 alizüng ya academic kisüng masü saka saisapong aser physical resources asoshi 'launching pad' ka ama amshitsü ayongzükba liasü.

Kaketshir tenzükba nung PSU küm 25 abensaba asoshi tepela lemsatepba mapang MLA aser General Secretary, Nagaland Football Association, Chairman, Governing Body NSL, Benei M Lamthiu-i parnok dang saisapong nung temulung agütsüba atema tenüngsang agütsü.

Pai saisaponger tem dang yimya shidak amshia asayatsü aser telungjem tanüla nung tokteptsü ayongzük aser asayadak yimya tajung angazükba ya takum nung nükjidong atongtsü asoshi tongtipang lir ta ashi.

Sentong metenzükdang jubilee nüngshilong ka semzük aser iba sülen nisang asongba mapang agia liasü.

## Maova yim dak Tourism Awareness training agütsü

**Dimapur, Aenjeti/January 12 (TYO):** Department of Tourism ajanga Nagaland Tourism Association (NTA) den lungjemer Tourism Awareness Training on Tour Operation and Tour Guiding sentong ka January 10, 2026 nü Maova yimtsüng nung agia liasü.

Iba sentong ya Maova yimtsüng nung January 16-17, 2026 anogotem Mimkut Mini Hornbill Tribal Festival agitsü aliba dak sendakba nung agia liasü.

Sentong nung Senior Tourist Officer, Dimapur, Keholeno Kennao-i "Community-based tourism & promoting sustainable tourism in Nagaland" onük nung ajemdaker jembia liasü.

Lai lanurtem dang tourism ya profession ka ama rangloksü ajungmeso aser yimtsüng nung tourism nükla ajiteta department aser NTA den lungjemer skill development programmes balala nung shilem agitsü ajungmesoa liasü.

President, Kuki Inpi, L. Singsit, IPS (Retd.) ajanga Mimkut Festival nung sobaliba aser tourism asoshi nükla aliba aser sobaliba wazüka ayutsü nüngdakba indang rateta ashi.

Sentong nung Senior Head Assistant, Department of Tourism, Khonak Konyak menden liasü aser Lunmang Lunkim, Head Deacon, Maova Christian Church ajanga sarasadem.

Sutminlal, Village Council Chairman, Maova Village ajanga pela agizükba o jembia liasü.

Technical session ya shilem ana lemsar mezüngbuba nung Veshehi Kezo, General Secretary, Nagaland Tourism Association ajanga "Tour Guiding Ethics and Tour Guiding as a Profession" onük nung jembia liasü.

Tanabuba session nung Vimeto Vakha, President, Nagaland Tourism Association ajanga "Tour Operation and Homestay" onük nung jembia.





January 12, 2026 nü Ahmedabad nung Ato kilonser Narendra Modi aser Germany Chancellor, Friedrich Merz nati International Kite Festival nung shilem agiba noksa nung angur.


## PM Modi-i Commonwealth Speakers' conference tenzüksütsü

**New Delhi, Aenjeti/January 12 (Agencies):** Brihostibarnü Ato kilonser Narendra Modi-i 28buba Conference & Speakers and Presiding Officers of the Commonwealth (CSPOC) tenzüksütsü, aser iba sentong nung züngsem linük 56 nungi linük 42-i shilem agitsü. Hombarnü Lok Sabha Speaker, Om Birla-i, iba conference puti otsü nung tang mezüng linük teimtibai shilem agitsü, ta metetdaksü. Australia, Canada aser United Kingdom densema linük aikati shilem agitsü, ajisüaka Bangladesh nungibo shilem magitsü, kechiyong tang iba

linük nung Parliament anena lir; iba dak alia Pakistan-a madentsüa akok, ta metetdaksü. January 14 nungi 16 tashi New Delhi nung ayongzüka aliba senden nungji Speakers aser Presiding Officers 61-i shilem agitsü. "28buba CSPOC India nung ayongzüker aser iba senden nung tang linük teimbai shilem agitsü aliba ya India atema tenüng tajung," ta Birla-i ashi. 27buba CSPOC 2024 küm January ita nung Uganda linük nung ayongzüka liasü aser iba senden nungji India nungi Rajya Sabha nung Deputy Chairman

Harivansh dena liasü. Bodbarnü iba senden dak sendakba nung Lok Sabha speaker Om Birla leniba nung CSPOC Standing Committee senden amentsü. CSPOC senden nung workshop sessions aika alitsü aser item senden nung jembitsü aliba onüktem rongnung "AI in Parliament: Balancing Innovation, Oversight & Adaptation", "Social Media & its Impact on Parliamentarians", "Innovative Strategies to Enhance Public Understanding of Parliament & Citizen's Participation Beyond Voting" densema lir.

## Taoba mapang tatong Tir, Jagdeep Dhankhar AIIMS nung mongdar



Jagdeep Dhankhar

**New Delhi, January 12 (Agencies):** Taoba mapang linük tatong Tir, Jagdeep Dhankhar anaben tashi süchia aoba sülen Hombarnü Delhi nung aliba All India Institute of Medical Sciences (AIIMS)-i anir ogo; tang pa arrshi küm 74 lir. Yaküm July ita nung Dhankhar-i pa temang manemi dang aliba kuli metetdakja tatong Tir menden nungi anenba shidi agüja liasü. January 10, 2026 nü pa metsümeshidak lia anaben tashi süchia oa liasü. AIIMS nung doctor temi pa dang temang nung timtem putettsü atema magnetic resonance imaging (MRI) scan agitsü asüngdang. Hombarnü Dhankhar-i temang tendangtsü atema

AIIMS-i ao, ajisüaka doctor temi pa temang tendangba sülen pa dang hospital nung amongtsü tuyu. Yaküm-a sentong balala nung pa temang mejungi aküm aser sentong kar nungbo pa süchia oa liasü. Uttarakhand, Kerala aser Delhi nung ayongzüka sentong balala nung adendang pa temang mejungi akümba osang aika lir. Dhankhar ya tatong Tir makümdang West Bengal Angh aser MP inyakba den külemi menden balala nung tenzüka aruogo.

## JeM tongti Masood Azhar-i India nung kiralongratsü amokmerener

**New Delhi, January 12** osang jagi alima asüngtsü, ta (Agencies): Kiralongrar telok ashi. Jaish-e-Mohammed (JeM) Azhar-i, JeM-i shimokba nung tongti, Masood Azhar-i taküm tenlatsüpurtem jagi audio osang ka ajanga India senotsü mesüra rongsem nung bomb amshia tesem memeshir saka taküm balala amaktsü atema taküm bendanga agütsüner, ta ashi. bendanga agütsür bomb Mohammad Masood Azhar pokdaksür aika India-i yoktsü Alvi ya Islamic kiralongrar ka renema lir, ta amokmerenogo. lir aser 'alima nung kiralongrar' Paisa, taküm bendanga ta sangdongba lenir ka lir. agüja kiralongratsüpurtemji ka Azhar ya Pakistan nung mesüra meyrjang masü saka amenoka aliba kiralongrar aika lir, aser züngdangbaji telok Jaish-e-Mohammed tejangja metetdaksüra iba tentetsang lir.

## Congress-i West Bengal nung lenirtem ajurua asalentong yanglutsü

**New Delhi, January 12** Congress-i West Bengal (Agencies): West Bengal nung assembly election agitsü joko Roy Burman, Shakeel Ahmad Khan, aser Prakash Joshi mapang ana nung lia January 17 nü Congress bangdak lenirtemi West Bengal nung party lenirtem den senden mena election atema terenemshiba jenjang asadangba den külemi taruba election atema asalentong renemtsü. Kolkata nung January 18 nü party West Bengal screening committee senden amentsü aser kasa anogo nungjisa political action committee, election committee aser senior party observers den senden amentsü. January 17 nü bangdak lenirtem aser state nung party lenirtem senden amenba mapang nung election nung tanga party den lokteptsü atema-a jembitsüa akok. Congress-i West Bengal assembly election atema Sudip Roy Burman, Shakeel Ahmad Khan, aser Prakash Joshi nung senior observers shimogo. January 17 nü ayongzüka senden nungji AICC general secretary in charge of West Bengal, Ghulam Ahmad Mir, West Bengal Congress Committee chairman Subhankar Sarkar, AICC general secretary in charge of organisation K C Venugopal aser Congress National Tir, Mallikarjun Kharge nung adentsü. Taküm West Bengal, Assam, Kerala, Tamil Nadu aser Puducherry nung assembly elections agitsü, kechiyong item assemblies kümsükji taküm May-June ita nung tembangtsü.

Form No. 3  
[See Regulation-13(1)(a)]  
**DEBTS RECOVERY TRIBUNAL GUWAHATI**  
Suwarna Bhawan, House No. 12, New Town Path, Near Hanuman Mandir,  
G. S. Road, Ulubari, Guwahati-781007 (Assam)  
Case No.: OA/302/2025  
Iba Act nung section 19 kübok sub-section (4) aser Debt Recovery Tribunal (Procedure) Rules, 1993 nung rule 5 kübok sub-rule (2A) nung ajemdaker jaoker.  
Exh. No.: 5462

STATE BANK OF INDIA  
-Vs-  
ECHAHABA TEA GROWERS CO-OPRATIVE SOCIETY LTD & Ors  
To,  
(1) ECHAHABA TEA GROWERS, CO-OPERATIVE SOCIETY LTD.  
18th Mile, P.O. Tuli, District Mokokchung, Nagaland- 798618.  
(2) AOTOSHI CHAIRMAN ECHAHABA TEA GROWERS CO-OPERATIVE SOCIETY LTD  
Son of Natwar Thakkar, House No B-42, Darogapathar, Sector 8, Dimapur, Nagaland-797115  
(3) TEMJENNUNGSANG, SECRETARY ECHAHABA TEA GROWERS, CO-OPERATIVESOCIETYLTD  
Son Nangshimeren, P.O Changtongya, Tuli Merangkong, Mokokchung, Nagaland-798613  
NAME OF PROFORMA DEFENDANT  
North Eastern Development Finance Corporation Ltd, G.S Road, Sanket Vihar Dispur Sarmotoria Guwahati-781006  
JAOKER  
08.12.2025 anogo nung Hon'ble Presiding Officer/Registrar matsüngdang OA/302/2025 benoka liasü.  
Sentsüh Rs. 91,75,914.65/- alangzüksü atema na anema benokba (OA) nung iba Act nung section 19(4) kübok shia aliba Application nung ajemdaker iba Tribunal-i jaoker/notice agütsür (application den documents etc. keta lir). Iba Act nung section 19 kübok sub-section (4) nung ajemdaker na, defendants dang teküboklen alibatem tuyur :-  
(i) tabaja agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksür;  
(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;  
(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;  
(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;  
(v) Ordinary business ajanga secured assets mesüra tanga assets aser kiojen nungi yokzüka senji security interest soita aliba bank mesüra financial institutions indang account nung deposit asütsüla.  
Nü dang tezüluba nung sangdong applicant nem agütsütsü tuyur aser 21.01.2026 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangsü aser na meliaka telemetba agitsü.  
For Paper Book follow the following Url: <https://cis.drt.gov.in/drtlive/paperbook.php?ri=2025129370816>  
09.12.2025 anogo nung tsünglanglen kü meyongnem den iba Tribunal indang seal agütsür:  
Registrar  
Debts Recovery Tribunal, Guwahati

केनरा बैंक

Canara Bank

A Government of India Undertaking

संयुक्त ऋण संस्थान

Syndicate

SALE

NOTICE

DIMAPUR BRANCH

I Floor, Latika Complex, Nyamo Lotha Road  
(Church Road), Dimapur, Nagaland,  
PIN- 797112, Contact: 8837311044

E-auction Sale Notice For Sale of Immovable Properties under the Securitisation and Reconstruction of Financial Assets and Enforcement of Security Interest Act, 2002 read with proviso to Rules 8(6) of the Security Interest (Enforcement) Rules, 2002

Tsünglanglen rasaa shia aliba belenshitsü makokba rongsen ya sen aputsü atema Canara Bank nem mortgaged/charged süa lir ta nübur aser talisa sen apur aser guarantor dang metetdaksür aser ibai Canara Bank indang Branch dang sen apur aser guarantor nungi sen apua aliba menoktsü asoshi **29.01.2026** nü **"As is where is"** aser **"Whatever there is"** nung ayoktsü. Earnest Money Deposit (EMD) ya **28.01.2026** **nikongdang 5:00** ako tashinung inoktsütsüla. Auction ya website: <https://baanknet.com> ajanga **"Online E-auctioning"** asütsü. Auction anogo aser mapang: **29.01.2026** **anepdang 11:00** ako nungi **nikongdang 1:00** ako tsüngta. (Ayokba metembang tashi mapang minute 5 atsülangtsü) Branch, borrower/guarantor, liability, description of the property and EMD, reserve price indang tejangja:

| Sl. No. | (A) Name & Address of Secured Creditor/ Branch<br>(B) Name of Borrower/ Guarantor                                                                                                                                                                                                        | Brief Description of Immovable Property                                                                                                                                                                                                                                                                                   | (A) Total Liabilities (Rs.):<br>(B) Reserve Price (Rs.):<br>(C) EMD (Rs.):<br>(D) Increment Amount (Rs.):                                                               |
|---------|------------------------------------------------------------------------------------------------------------------------------------------------------------------------------------------------------------------------------------------------------------------------------------------|---------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------|
| 1.      | (A) Canara Bank, Dimapur Branch, I Floor, Latika Complex, Nyamo Lotha Road (Church Road), Dimapur, Nagaland, PIN- 797112, Contact: 8837311044<br>(B) <u>Borrower / Guarantor:</u><br>M/s. Tizu Trade Agency<br>Proprietor:- Sri Kavito V Yephthomi<br>(Guarantors)<br>Sri Kiyekhu I Sema | All that part and parcel of a plot of land covered by Patta No. 430, Dag No. 142/ 505, Mouza No. 03 block Dubagaon, Dist.- Dimapur, (Nagaland) land measuring 1 Bigha - 2 Katha - 13 Lechas.<br><br>Boundaries (As per Sale Deed):- North- Main Road & Mr. Zakheto, South- Mr. Vinizhe, East- Main Road, West- Mrs. Shela | (A) Total Liab.:<br><b>83,92,895.97</b> + further interest & cost.<br>(B) Reserve price:<br>47.60 Lakh<br>(C) EMD: Rs. 4,76,000.00<br>(D) Increment Amount:<br>20,000/- |

Iba indang terms and conditions tejangja metettsü asoshi Canara Bank indang website ([www.canarabank.com](http://www.canarabank.com)) nung link "E-Auction" nung agüja lir mesüra Manager of Dimapur Branch, Contact No. **8837311044** den mapa inyakba anogo mashi nung office mapang jembitettsü.

Date: 30.12.2025, Place: Dibrugarh

Authorized Officer, CANARA BANK





## TIR YIMYIM YIMOBILEM (EDITORIAL)

DIMAPUR TUESDAY, JANUARY (AENJETI) 13, 2026

### AKM Alizüing

**T**anü January 13 nungi tenzüka 15 tashi Chungtia yimti nung Ao Kaketshir Mungdang (AKM) 70 buba inti mungdang amungtsü. Atangji, 1929 küm AKM tenzükerbo taküm agi küm 97 buba asütsü, anungji 2029 küm AKM noklangjungmung amungtsü. Tetezü AKM yabo Nagaland danga kanga agia tantsü aser tambu lir, iba jagi Naga kintem rongnung yimten aser tanela khuret Aotsür Aortemi tama reprangteta abentsü tenzüka kuli ka sayur. Aji oda, AKM nükjidongji “ Linük asoshi” ta asütsü mulungtet, kechiyong Naga kintem asoshi linük temeja ka mali, British nungera masü aser India nungera masü, tetsüingda ka nung Naga kintem ajurutepdak sabanga maka ta asüba mapang ka Ao Kaketshirtem telungjem sabang ya tentet. Aji oda, Ao kaketshirtem asoshi alizüingji ‘Linük Asoshi’ inyaksübaji liasü. Atangji, küm 97 jakdang Aor kaketshir lenirtemi anguba linükji Ao lima dangbo masü saka Naga lima liasü, iba Naga limaji tang Nagaland state dang nungi kanga agia tuluba lima ka lir. Aji oda, Naga lima nung Naga nunger asoshi yimten yimli temeja ka lateta Naga nunger temzüing ozüing aser sobaliba kübok kin ka kuma külemi lia aotsüba tejangraba aser nüklaaji AKM alizüing liasü. Atangji, Naga kin ajak yimten sabang ka kübok longjema melitetaka, AKM tenzükdangbo 1918 küm Naga Club tenzükadoker liasü aser AKM akümba küm 1929 küm Naga Club purtemi British yimteni shimtetba Simon Commission nem tezüluba nung India nungi British nunger oadokba sülenbo Naga nungerbo India yimten kübok mesüi Naga nunger mulungba nung yimten jenjang latetdakjang ta metetdaksü, ajsüaka British nungertemi Naga nungertem ya India kübok Assam state nung alitsüsa toktsür oa adok. Iba ama Naga yimten temeten indang tejembidak nung AKM ya Linük Asoshi inyaksü pur telok ka aküm, anungji AKM lenirtemi anir Mokokchung nung India government-i ayongba tongtibang sentongtem melidaksütsü asoshi nokdanga aru aser AKM-i anir Naga nunger kaketshirtem longjemer Naga yimten tementen jenjang ka atema jembitsü asoshi Naga Students’ Federation aküm. Ibajiang shitakba AKM alizüing liasü. Atangji, tanü iba alizüingji AKM nükla nung yur, shitakba nung menguaka, angu ama bilema pei yimten temeten mesamadaksüi AKM-i 14 August shia Naga Independence Day amungba angur. Ajsüaka, tanü tensa asenok Naga yimten temeten mamadoki wazüka ayuba tamaisü sayuba dak alaka, 1929 küm AKM aser Naga Club alizüing atongtsü asoshi kanga saaka kümogo. Iba jagi, asenoki ayuba alizüing matongtsüji odang meyipdi ta masü saka Alizüing Akangshitsübajiang kanga nüngdak, kechiyong asenok tongpang nung maitsüi noktak tashijibo tamakok ta masü, anungji alizüing atong matong ta masü saka tongpang nung akanga nokdaka lir mali ta asübajiang asenok asoshi tongtibang asütsü. Iba tangatetba nung tang AKM 70 buba inti mungdang omen “ Alizüing Züngkümshiba” ta shimtet südi ta angateter. Atangji, tanü asen linük asoshi inyaksübaji yimten nüchiso bushiba telok ka nung adenba agia meinyaktetsüa akok mesüra telok tasen ka tenzüka agia alizüing metongtetsüa akok, saka linük asoshi inyaksü nüngdak tulutibaji asenok Naga nunger aser Aotsür Aor shia dak pei tetsü tasoli meimba shisatsü alitsü tim. Iba shisatsü jagi dang pei linük aser pei nübortem asoshi tasüa majem aser timtem aser sensak arema ochi temeten tongpang nung nokdaktetsü. AKM alizüing yabo asen kija ajungtsü saka tangarbo majungtsü, asen kija akatsü saka tangarbo makatsü ta asüba nükjidong masü saka Naga nunger ajak Naga lima nung pei yimten temeten aser sobaliba kübok liromedema alima kintem tsüingdang nümadangdanga lia aotsü asoshi lir. Iba alizüing atongtsü atema, akhidangbo injang prangbong bushi aser tangar bendanger teyari meshi, saka tanübo injang prangbong melen tashitemetet aser Tsüngrem tsübuba shisatsü bushitsü aser tangar bendanger teyari meshitsü melena asenok Naga nunger putepa alitsüang nüngdaker. Iba kasa alizüingji asen nükla nung yur, tanü asenok alitsüsa alizüingji metongtetaka, alizüing atongtsüba temeten aser nüngdak indangji, talisa, asenok kaketshir aser lanurtem rongnung jembimanentsüla, kechiyong jembiba agidang mapa akümer.

## OLEMSABANG

### Aomongchen Otsü

- Temjenyuba Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

**Tesatempa Telok:** Onok ya tesatempa telok lir aser onok ya tsümar ao semer adenshidak tzü adena or alima tesatem nung sadem sadema meyoktepa kati ka jangjatsü kangabo mejangraba tesem nungi lir. Onoki tzüpak tzüsem adena or aliba indang ajak jungjunga meteta lir anungji sobalibaji meliaka aser mebenshiaka onok sadem sadema dang alir.

**Obula Metetsang:** Oh! Tesademba telok, nenok ya tesungmangtsü ka ato ya, alima tashitemetetbo jenti dang kar aser nenoki memetetba kecha mali saka ajiangjo nenoki abena aliba süji kechi kin indang ya? Asen Aomongcheneri abenba indangbo masü ato. Hai tetsü! khi jung junga ajiangjo nibo parnok ngur kangasa temolung ani mesüngzüker. Ya asen ao kin ayak tongtipangsa Aomongchener tem to yamai dang kümatokoko na? Temolung mayanger na?

**Otsüla:** Ibaya kechi tai? Yimten, arogo mesüra kija kibongi lanu asensortem dang temolung magütsür asü mesüra tsüraburi ali rongsen agi dang mesüteta anitetta tesadem lima nungji kecha mezüingshi, mesayu doktsü asü?

**Obula:** Hao hao tetsü, kija kibongi aser lokti ajaki khi parnok nem temolung agütsütsüla tim kechiaser asüing asen arogo yimten yimli nüklaaji parnok tapubang nungang lir .

**Obula:** Sürabang tesademba telok, nenoki abena aliba süji kechi indang aser kong nungi lir?

**Tesademba telok:** Uncle and aunty onoki abena aliba sü dang ya sama-chari sü ta ajar aserbo iba sü ya parnok benjong kati aodang onok nem agütsüba lir. Anungji onoki iba sama-chari sü ya senti rongsen amai bilema iba sobaliba metetba lanu asensortem sentongi abener aruba lir.

**Obula:** Aya! Tesademba telok nenok tetsü tebou mesüra nenok tsüraburbo onoki jungjunga dang meteta lir ako, shir chir, shir semchir, kechi kidong nungi jakzüka aruar item ajakji meteta kar. Kechiba onok tain dang uncle aunty ta ajar, iba yabo ali poker jembia aruba asen tetsü oshi jayajakobo masü ato! Iba ya tzü adena or aliba nisung oshi, anungji nenok ajaki kena dang otsü obu ta tanü nungi ajatsü. Taser ano tongtipang kaji iba amala asenok aoer senden kati arudangbo sama-chari süji masü saka meraket keta teburi tsüngkoteptsü mesüra tetsüri etsüing sü abener perang peranga ni Aor chanu ta arutsüla ato. Tangari na kong nungi, kechi kin ,mesüra kechi yimer ta masüingdangdang yongi nü indang sobutsü ayak mesüra jayajako, jembishinü agi sayutetra iba jagi na Aomongchen yimti jala aser jabaso, akhum taket Aor chanu ka ama nenokji asen ao kin asoshi sentsü, konang aser narokum ka lir.

**Tesademba telok:** Aya! otsü obu nenati kangasa jungjunga taroktiba nung onok dak maliba ka angateta ratet rateta shiogo iba atema kangasa pelara. Onok ya tenüingbo ao kin nungi saka aoer senden nung khi dang metendang aser moudang. Aji oda süaka shingai onok dang kecha mashir, majar, shilem balala kecha nung mamshir saka tesademba lima asünungji item nung jagi pilar sadem sademadang liteper. Alima indang shia metetbaji onok atema teperi, onoki kechi jembir, kechi sobur, kechi tenüing ajar kecha tongtipang ka masü ta bilema liasü saka tang nungibo aoer senden ajak nung züingsem tajung ka ser jangyu metema anidaktsü. Nena tanü süngmangseta aser temolung shiranga bilema onok metongshitsüba, onok dang sayuba jagi onok Aomongchen yimer ka ama, aser Aor chanu ka ama len anidaktsütsü aser metangtangi bushiloka aser asüingdangya süa aotsü. Kangasa pelara Otsü Obu.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Gaza nung Khristan nütsüng 500-600 shi dang anüngogo



October 24, 2025 nü Gaza City nung aliba Greek Orthodox Saint Porphyrius Church nung Palestine nunger Khristantemi Israel-Hamas tsüngda rara mapang nung asürtem nem akhüm agütsüdang tangokba noksa nung angur.

**January 12, 2026:** Gaza Strip nung rara metenzükdanga Khristan nütsüng ishika dang liasü aser rara tenzükba sülenbo ano nütsüng ishiba dang kümogo.

Joko tang Gaza nung Arogo asem dang lir, aser item Arogotemji- Greek Orthodox St. Porphyrios Church, Roman Catholic Holy Family Church aser Gaza Baptist Church lir.

Tesüiba küm aika rongsenkettzüng tsütsü timtem ajangshiba den külemi tamangertem aikati Gaza toktsür aoba ajanga Khristan nütsüng kanga ajemadoker lia ano 2023 küm October ita nungi Israel aser Hamas na tsüngda rara tenzükba sülen ano Khristan nütsüng aika ajema kümogo.

Holy Family Church nung putir, Gabriel Romanelli-i Gaza nung Khristan nütsüng kanga ajema akümba osang metetdaksü.

Putir Gabriel Romanelli ya Argentina nunger lir aser pa tesüiba küm 20 dak tali Gaza nung lia Khristantem tenzuka arur.

Putir Romanelli-i, 2023 küm October 7 anogo tashi nung Gaza nung nütsüng million 2.3 nungi Khristan nütsüng 1,017 liasü aser rara tenzükba sülen Khristan kibong aikati Arogo Tenla kidang jenoka liasü, ta metetdaksü.

Israel aser Hamas na tsüngda raraba mapang nung iba Tenla kidang Muslim nunger densema nisung 700 dak tali jenokdakja liasü, aser tang-a nisung 450 jenoka lir, ta pai metetdaksü.

Putir Romanelli-i, "Tan Khristmas mongpubo balaka liasü. Onoki kanga teintet sensotem, shirangertem aser sensakertem dang temeim mapa sayuogo. Onok tang tashi taitba kümogo ta bilemer, kechiyong onoki tesüiba mapang dang

nungi tang tongmelangba agi tamang sayuogo," ta ashi.

Paisa, tang Gaza nung Khristan kwi anünga aliar tejangjabo memetet, ajisüaka Khristan 600 shi dang alitsüa akok, aser tang anünga aliba Khristantemji St. Porphyrios Tenla ki aser Gaza Baptist Church na nunga jenoka lir, ta metetdaksü.

Rara mapang nung Tenla ki asemji tekülem ki dang masü saka nisungtem lendong nungi jenokba ki liasü.

Osangbener den jembidang arrshi küm 13 Judy-i, "Kari Gaza toktsür tanga linüktemi ogo. Onokbo küm ana tashi rara mapang nung yangi liasü. Anogo 17 tashi ken o jembia aruba sülen yimjung tezüngzüktep yangluogo saka onok tang tashi kidangi meyipa mao, saka yangi (Tenla kidang) tesünep nung pelaa alir," ta ashi.

2007 küm tashi nung Gaza nung Khristan nütsüng 3,000 dak tali liasü aser 2023 küm tashi nung Khristan nütsüng 1,000 shi liasü. Gaza nung rara mapang nung Khristan 30 nungi 44 shi süogo aser aikati Gaza toktsür ogo; tangbo Gaza nung Khristan nütsüng 500 nungi 600 shi dang alitsüa akok ta asadangteter.

Gaza City nung refugee ka, Dimitri-i, "Onokia toktsür aotsü. Tesüiba küm asem tsüngda onoki timtem aika ajangshia aruogo. Chiyungtsü tera aser mozü tera dang liasü. Tangbo parnoki teyari agütsüba ajanga onok ket nung chiyungtsü, mozü aser nüngdakba oset balala lir. Anungji tangbo onok pelaa alir," ta ashi.

Rara mapang nung Holy Family Church-ia Tenla kidang Muslim nungertema jenokdakja liasü. Khristmas mapang nung parnoki tongmelang agi dang sentong agi aser tetsübu tensa nung dang sarasadema aruogo.

Osangbener den jembidang

Palestine nunger Khristan tsür Samira Al-Madback-i, "Tan Khristmasbo tesüiba mapangtem dang nungi khenyongi balaka lir, kechiyong ozü nüburtem aika süadokogo, ajisüaka iba ya Khristmas benjung ka asünung onoki sarasadema iba benjung mongner. Onoki tanurtem peladaktsüner," ta ashi.

Laisa, "Khristmas ya temeim aser yimjung chuba, Yisu Khrista asoba benjung lir, ajisüaka onoki tekülem dang agia aruogo. Tan Khristmasbo onoki sademsadema mongogo. Tsüngremi melungba dang süra Gaza tesem ajaklen yimjung alitsü. Tsüngremi asür Khristantem aser Muslim nungertem moajang," ta ashi.

Odisha nung arrshi küm 90 Khristan ka tasü mang aremtsü memela

**January 12, 2026:** Odisha state nung yimdaklirtemi arrshi küm 90 tambur Khristan ka tasü mang aremtsü memelaba agi anogo asemnü tashi tasü mang meremtet i aruba sülen tesüsa yimdak nungi kilometer aika pila remogo.

January 7, 2026 nü Rangamatia yimdak arrshi küm 90, Chhuta Hansda asü. Par kibong züngsemtemi Khristantemi benshiba ama tasü mangji aremtsü atema renemba mapang nung Bharat Hansda ta ser nisung kati Sarna tribal yimsü dak sendakba benshia asüpila sentong agitsüla, ta takhangba agütsü.

"Ajisüaka ozü kinüngertemi, onoki küm aika tejaklen Khristan yimsü agizükogo, anungji Khristan yimya nung dang asüpila sentong agitsü ta ashi," ta asür Hansda'er semchir, Sanatan Hansda-i metetdaksü.

Paisa, Bharat dang masü saka Sarna tribal yimsü amangertem aikati Sarna yimsü dak sendakba nung asüpila sentong magira

ANO GO ABEN TSÜNGREM DEN

Yisu Tsüngdang Amenba

Saka Martha sorochioktsü mapa jenti agi temulung timtemdaksü aser lai Pa dangi arua ashi, "Kibuba, kü nui kü kija mapa inyaksü toktsür, aji nai meshisadanger ma? Anungji kü dang yariang ta la dang shiang". (Luke 10:40).

Marthai Yisu kanga meim aser Pa asoshi ajak inyaksü. Yisu tenzüktsü asoshi Marthai mazü ngi mapa inyak aser Pa anasa alitsü aser Pa tajungba metettsü mapang magütsütet. Marthai mapa temerangba inyakli tenu dang mepelaba kümli asü. Marthai Yisu asoshi kidang mapa ajak tipdema inyaksü merangdang, tenu Maryi Yisu tsüngdang mener pa dang angaa ali. Martha mapa junga, pela tenzük saka raksa aser jashi aser tenük merema atem.

Khristai na atema inyakba tepela aser temeim sayua tenzükbaji junger. Saka kodang ne mapa agi ne mapang aser tashi ajak agir, Yisu asoshi mapang magütsü lir, na kanga mazü ngi akü mer! Nai Marthai bilemba ama bilemtsü akok, nai meinyakra matemtsü. Aji shidak asütsü akok, saka nai mezü ngbuba südaktsütsü baji, Pa den tesendaktep shidak ayutsü baji lir ta Yisui sayu. Iba nung jagi tanga mapa kari atsür odaktsü ra ibaji Tsü ngrem nungi masü. Khrista den tesendaktep ajendangba mapa inyaksü Tsü ngremi ne dang masü ngdang er. Tsü ngrem tajungtiba metettsü ba le mang tajungtibaji tenzükba lir. Mapang kar nung Pa tsü ngdang mener Pai ashiba angabaji lir, Pa tsü ngdang mener ajem ajema Pai ashiba angabaji tali tongtipangba lir.

Asenok teti Pa tsü ngdang mener angatsü maja, aji oda sü ra mapa nung tamakok alutsü. Mesü ra Pa nungi tashi magi-i dang maneni inyaksü asenok maja. Na Pa den mapang meintoki dang kanga meranga tenzük er asü ?

tasü mangji meremdaktsütsü ta ashi, ta metetdaksü.

Yamaji mangatettep adoka lia January 9 nü police aser revenue ketdangser kar yimdaki aru, saka parnokia iba mangatettepji bentettsütsü mekoki liasü, ta Hatigarh Parish Council nung secretary, Binod Hansda-i metetdaksü.

Binod-i, "Iba mangatettep ya tepor kanga mejungi tembanga liasü. Nisung asü ba sülen anogo asemnü lir sülen ang police tetuyuba nung par kibongi yimdak nungi kilometer aika pilar ang asüpila sentong agia tasü mang aremtsüsa aküm," ta metetdaksü.

January 11 nü osangbener den jembidang United Believers Council Network India nung tekolak, Pallab Lima-i, "Iba ya tang mezü ng ataloker masü. 2024 küm aser 2025 kümtem nunga iba area nung Khristantem tasü mang aremba nokdanga liasü," ta ashi.

"Odisha tesem balala nung tasü mang aremtsü atema Khristantem nem temeden

magütsü ba ya tebilemtsü onük tuluka kümogo," ta paisa metetdaksü.

Putir, Lima-isa, "Yimtenren party kar den tesendaktep aliba ozü ng alema inyaker temi asalentong yanglur Khristantem anema inyaker," ta ashi.

Odisha state yimtiba, Bhubaneswar nung Khristantem temeden atema inyaker Pratima Minj-i, tesüiba küm asem tsü ngda tribal nütsü ng aliba district aika nung tasü mang aremtsü atema Khristantem nem temelaba magütsü ba tatalokba aika lir, aser iba ya Khristan yimsü toktsüdaktsütsü nü kjidong nung inyaker, ta aitsü.

Yaküm Odisha state tesem balala nung Khristantem anema inyakba tatalokba 40 dak tali liasü, ta United Christian Forum-i metetdaksü ogo.

Nütsü ng million 42 aliba Odisha state nung nütsü ng shilem 2.8 dang Khristantem lir. Iba state nung nütsü ng shilem 90 bo Hindu nungertem lir.



**AO OSHI ANGAZÜKDAK:****TANÜ ANGAZÜKTSÜBA OJANG****Tsürem****(v)** tsübua ait ( feel scared)

\* Ni azük talangi atutsü kanga tsürema bilemer.

**Tsürokmarä****(adj)** anükalem mali, tanep masü (roughness)

\* Tsürokmarä nisungi mapa inyakdang oset raksar.



Tir Yimyim

**OLONG PAITEP # 7382**

|    |    |  |    |  |   |    |    |    |   |    |
|----|----|--|----|--|---|----|----|----|---|----|
| 1  |    |  | 2  |  |   | 3  |    |    | 4 |    |
|    |    |  |    |  |   |    |    |    |   |    |
|    |    |  | 5  |  | 6 |    | 7  |    |   |    |
| 8  |    |  |    |  |   |    |    |    |   |    |
|    |    |  | 9  |  |   |    |    |    |   |    |
|    | 10 |  |    |  |   |    |    |    |   |    |
|    |    |  |    |  |   |    |    |    |   |    |
|    |    |  |    |  |   |    |    | 11 |   | 12 |
|    |    |  | 13 |  |   |    | 14 |    |   |    |
|    |    |  |    |  |   |    |    |    |   |    |
| 15 |    |  |    |  |   | 16 |    |    |   |    |

**TIPIEN**

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T \_\_\_ lu - (3)
10. Takdang temalen - (9)
11. Tesa \_\_\_ a - (3)
13. Ajungbena temulungjang  
tongtonglatsü atu - (5)
15. Tejen lai nung tesayur - (5)
16. Tsüngsak-mopung - (5)

**LANGTSÜNGLEN**

1. Reprangdaksü - (4)
2. \_\_\_ ur - (3)
4. Kiojen yangludak - (6)
6. \_\_\_ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemetdak - (6)
12. \_\_\_ adenshi - (4)
14. Tsünüsenbongsü adokdak - (3)

**OLONG PAITEP # 7381 TELANGZÜBA****TIPIEN :**

1. Aben, 4. Artsü, 7. Lisem,
8. Liwa, 9. Sarasadem,
12. Aket, 14. Mangu, 15. Anünü,
16. Ango.

**LANGTSÜNGLEN :**

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

**NAI-A YA METETTER**

Bedford nung arishi küm 19 tain Hope Roberts-i Guinness World Records naroküm ka nguogo. Roberts-i 'largest collection of Jellycat toys' naroküm angu.

La ket nung soft toys, stickers, bags aser keyrings densema Jellycat toys 877 tashi bendena lir.

**Justice Dere-i Meghalaya High Court Chief Justice inyaker****Guwahati, January 12, 2026**

**(Agencies):** Justice Revati Mohite Dere-i Meghalaya High Court nung Chief Justice inyaksü tenzükogo.

Meghalaya Governor C H Vijayashankar-i Raj Bhavan nung Justice Dere nem tezüngzüktep agidakja liasü.

Justice Dere-i Justice Soumen Sen nungi iba mapa melenzüker. Justice Sen ya Kerala High Court-i mapa belenogo aser taoba nung Justice Dere ya Bombay High Court nung judge ka liasü.

Justice Dere ya Pune nung aso aser St Joseph's High

School, Pashan o Ferguson College, Pune nung azüng aser idangji lai National Merit Certificate angu.

La Symbiosis Law College, Pune nung graduate asü aser University of Pune indang LLB merit list nung tanabuba jenjang takok angu. Iba sülen lai Cambridge Commonwealth Trust Scholarship nung University of Cambridge nung LLM azüng.

Justice Dere-i Bombay High Court indang writ cell nung assistant government pleader, Union of India atema senior counsel aser Union of India

atema additional public prosecutor mapatem inyakogo.

La Bench nung majungketdang Maharashtra nung government pleader aser public prosecutor ka ama inyaka liasü.

June 21, 2013 nü la Bombay High Court nung additional judge ka ama shimok aser March 2, 2016 nü permanent judge kümdaksü.

Centre sorkari January 1, 2026 nü la Meghalaya High Court nung Chief Justice inyaksü shimtet aser January 10, 2026 nü lai iba mapa inyaksü atema tezüngzüktep agiogo.

**Sonowal Kachari, Deori, Thengal nungeri Sixth Schedule jenjang meshir****Dibrugarh, January 12, 2026**

**(Agencies):** Assam sorkari Abdul Deori-i senden ka ayongba nung All Assam Sonowal Kachari Students' Union, Deori Assong Sixth Schedule Demand Committee, Sonowal Kachari Yuva Parishad, Sonowal Kachari community, aser All Assam Deori Mahila Parishad nunger aden.

"Mising, Tiwa, aser Rabha nunger aniokba asoshi pelar saka state sorkari Sonowal Kachari, Deori aser Thengal Kachari teloktem züngdokba atema aitsür" ta Banikanta Pegu Bhawan, Dibrugarh nung osangbener senden ka nung ashi.

Iba ya bendanga amshiba aser tim masüba mapa ka lir ta tanishirtemi ashi.

Deori Assong Sixth

Schedule Demand Committee Sonowal Kachari Students' Union, Deori Assong Sixth Schedule Demand Committee, Sonowal Kachari Yuva Parishad, Sonowal Kachari community, aser All Assam Deori Mahila Parishad nunger aden.

Iba senden nung parnok külemi Sixth Schedule jenjang meshitsü atema joint movement ka tenzüksü telemtetba agiogo.

Senden nungsa 1996 Bhuria Committee Report, aser 1983 küm Tripura Tribal Areas Autonomous District Council nung ajemdaker Sixth Schedule jenjang meshitsü atema

bangjemtep. Parnoki Assam aser Centre sorkartem dangi ken o abentsü lemtet.

Teloktemisa January 19 nü Guwahati nung lungkak aitba sentong ka agitsü aser idangji Sonowal Kachari, Deori, aser Thengal Kachari kintem Sixth Schedule nung züngsemtsü takhangba agütsütsü.

Maneni, February 5 nü Jantar Mantar, New Delhi nunga lungkak aitba sentong ka agitsü aser idangji kin asem nungi national-level organizations adentsü.

Union Home Minister Amit Shah-i tan ita Mising Festival nung adentsü atema arudang memorandum ka agütsütsü ta kin asem tanishirtemisa telemtetba agiogo.

**Manipur police commandos-i telungpur 2 apu****Imphal, January 12, 2026**

**(Agencies):** Manipur police commando temi central paramilitary forces teyari agia Manipur lendenlen telungpur züngsem ana apu.

Parnoki Singjamei Mayengbam Leikai nung People's Revolutionary Party of Kangleipak (PREPAK)

züngsem ka apu.

Iba nisung ya Mayengbam Roshan Meitei (Panganba) ta jangjaogo aser pa ya Langathel Kangeibung Lampak nung alir. Pa ket nungi mobile phone ka puogo.

Pa dang asüngdangyaba sülen joint forces-i Athokpam Khunou nung Kanglei Yaol

Kanna Lup - Socialist Revolutionary Party (KYKL-SOREPA) züngsem ka apu.

Iba nisung ya Elangbam Premchand Singh ta jangjaogo aser pa ya Hiyanglam Warakhong nung alir. Pa ket nungi Honda Activa ka aser mobile phone ka puogo.



## Cuba nem Venezuela indang totzü mesüra sen magütsütsü: Trump



**Houston, Aenjeti/January 12 (Agencies):** US tir Donald Trump-i Deobarnü sangdong ka ajanga Venezuela indang totzü aser sen Cuba nem magütsütsü ta ashiba den Communist-i yimsü asüba asetkong yagi Washington den tenangzüktepba ka yanglutsüla ta shiogo.

Venezuela ya Cuba atema totzü supply asür tulutiba lir, saka US nunger sepaitemi Venezuela tir President Nicolas Maduro apuba sülen Venezuela indang rongnendak nungi iba Caribbean nung aliba linük dang yagi khu abenba rong ka danga oa mali.

Kasa mapang nung Caracas aser Washington na Venezuelan indang totzü barrel million 50 supply asütsü atema USD billion 2 alang tenangzüktepba ka yanglutsü atema inyaktepba mapang ka lir. Totsü ayokba nungi aazükba sen ya U.S. Treasury-i ketdang asüba account tem dangi yoktsü. Iba ya Trump aser interim tir Delcy Rodriguez na tsüngda tesendaktep tendangba ka lir.

"Cuba dangi totzü aser sen kecha meyoktsü. Kanga memonudang parnoki tenangzüktepba ka yanglu nung ajungtsü ta nibo shidanger," ta Trump-i Deobarnü pa indang Truth Social sabang nung zülutsü.

"Venezuela nungi totzü aser sen aika yokba ajanga Cuba küm aika lia aruogo," ta Trump-i shisem.

Kasa mapang nung Cuba tir Miguel Diaz-Canel-i, Trump-i social media nung parnok amokmerenba aitsüogo aser ashiba agi, Cuba den tenangzüktepba ka yangludaktsütsü asoshi US dak kecha tashi mali.

"Cuba ya nüjiso ngur aliba sovereign linük ka lir. Onok inyakyim shngaia mazuöktettsü," ta Diaz-Canel-i X nung ashi. "Cuba-i shinga mamaker; linük ya US-i küm 66 tashi maka arudar; azü tokshia linük kümzüka ayutsü atema renema lir," ta paisa shisem.

Secretary of State Marco Rubio densema Trump kübok tongtimbang ketdangsürtemi,

US-i tawa Venezuela nung teka amoka inyakba ajanga Cuba nongshitsü ta shiogo.

Maneni Cuba Foreign Minister Bruno Rodriguez-i Deobarnü X ajanga ashiba agi, totzü ayoktsü atema mulunga aliba supplier mashi ka ket nungi totzü alitsü Cuba temeden lir. Paisa, security service balala agütsüba atema Cuba-i linük ka nungi danga senotsü mesüra osettsüset teyari ngua mali, ta ashi.

US-i Venezuela amakba mapang Cuba armed forces aser intelligence services züngsem 32 tepseta liasü. Cuba ya totzü atema Venezuela aser Mexico dak metaloker lir.

## South Korea-i North nung drone yimzüdaktsüba bushisüngdangtsü

**Seoul, Aenjeti/January 12 (Agencies):** North Korea-i parnok indang anüng nung South nungi yoka drone tem yimzüdaktsü ta shia aitsüba South Korea nunger k e t d a n g s ü r t e m i bushisüngdang tenzükogo. Drone tem ya civilian temi yok asütsü, ta Defence Ministry-i Hombarnü ashi.

Tir Lee Jae Myung-i ken o takaratiba nung bushisüngdangtsü nangzükogo aser Honibarnü ashiba agi, civilian temi drone tem yok süra aji aibelen tulu ka, koba ajanga South Korea indang security aser Korean peninsula nung yimjung amokmerener.

## MENUNGRA BILEMTETER



Asür Imtimeren



Asür Ajidong

TASÜBA ANOGO : 11.01.2025

Onoki kanga dang meima aliba jabaso ana, onok nungi pila akümüli toktsür tanü küm ka ajunger. Saka asenok akümüli aliba mapangtem bilemteter aser nena akümüli nung alidang mapa tajung aika inyaka toktsüba aser temeim mapa inyakba bilemteter.

Temeim Tsürabur, Adianutem & Kinungertem.

## Myanmar Rohingya kin samatsütsü merangba ken o ICJ-i lapoker

**The Hague, Aenjeti/January 12 (Agencies):** Myanmar nung Muslim Rohingya kin samatsütsü merang ta tai tonglokja aliba anema United Nations indang tematiba court ajanga ken o ka lapokogo.

Myanmar mitkar temi kin ajunga samatsütsü mechi Rohingya minority dak tenük yok, ta Gambia indang Justice Minister Dawad Jallow-i The Hague nung aliba International Court of Justice (ICJ) dang Hombarnü ashi.

"Ibai international law miimshia amshiba indang masü. Ibai shidakba nisung, shidakba otsü aser shidakba nisung telok ka indang lir. Myanmar nung aliba Rohingya indang. Raksatsütsü asoshi parnok dak tenük yok," ta Jallow-i ashi.

Myanmar mitkari tashiyim amshi tenzüka Rohingya nunger 750,000 shi pei ki yutsür timba kidanger Bangladesh linük nung oa jenoker küm ana lir 2019 küm Myanmar anema ken o ya Gambia ajanga ICJ (World Court) nung benoka liasü. Refugee temi nisung aika tepsetba, tashiyim amshia shi nung medemba aser ki o jen

raksatsüba ajangshia liasü.

Küm ter dak tema nung ICJ ajanga kin ajunga samatsüba ken o benoka jembiba ibai mezüngbuba alitsü, aser iba obendang yagi Myanmar alema oa Israel-i Gaza nung kin ajunga samatsütsü rarar ta South Africa-i benoka aliba nunga kongshitsü. Ken o ya hopta asem tashi jembitsü.

Iba mapang UN fact-finding mission ajanga 2017 küm tashiyim amshiba nung "genocidal acts" dena lir ta bushitet. Ajisüaka Myanmar nung aliba ketdangsür temi iba report ya magizük aser mitkar temi tashiyim amshiba ya Rohingya telungpur telok temi amakba langzüa tejangja counterterrorism campaign ka liasü ta ashi.

"Iba ken o ya ajanga komasür kin ajunga samatsüba jangjaba, koma kuli sayutsü aser koma aibelener nem temerenshi agütsütsü, itemji atema tongtipang tatishitsü sayutsü," ta UN indang Independent Investigative Mechanism for Myanmar tekolakba Nicholas Koumjian-i ashi.

Bangladesh indang Cox's Bazar nung aliba Rohingya refugee temi iba genocide case ajanga ochi obendang bener aruba nung yaritsü ta ashi.

"ICJ-i iba ken o jembiba ajanga küm aika timtema aruba tatem kati arutsü aser chichiba nung obendang agüja Rohngya refugee tem kumzüka ayutsü ta ozü nübur nem teimla tasen agütsür," ta Rogingya nunger tanishir Tawfiq Al-Mohsin-i osangbener dang ashi.

Iba ken o jembiba tenzükba ajanga Rohingya nunger küm aika timtema aruba tatem kati arutsü ta teimla tasen agütsür, ta Myanmar indang Women's Peace Network tekolak Wai Wai Nu-i ashi.

"Rohingya anema azüdokshiba mapang ochi bushiba aser Myanmar nung aibelener memerenshi yutsüba tatem kati arua ozü temeden tanaben angutsü asoshi alima ajang-ajanga nokdaktsüla."

ICJ nung ken o jembiba ya Rohingya nunger timtem balala ajurur alirtem ken o international court nung jembiba mezüngbuba alitsü, saka iba ken o jembiba ya

nüburtem aser media dang mesayutsü.

"ICJ-i Genocide Convention kübok Myanmar aibelena aliba ngutetra, kin samatsüba atema linük ka aibelen ta kumtsüba tongtipang mera ka asütsü," ta Rohingya temeden asoshi nokdakba telok Legal Action Worldwide (LAW) ajanga ashi.

2019 küm ICJ nung mezüng ken o jembidang Myanmar nung iba mapang lenir inyaka alila Aung San Suu Kyi-i The Gambia-i kin ajunga samatsütsü merang ta tai tongloktsüba magizük. Mapang tatsüka lir mitkar temi tashiyim amshia 2021 küm lar sorkar atsüngdok.

Yimten tashi raktepba ajanga Myanmar nung rongrong tulu adok, kong mitkar temi democracy bhukuma longkak aiterem pua merenshi aser ibaji ajanga linük tesem ajungalen nok-nü amer yimsüsür anema nokdak.

Myanmar mitkari kin ajunga samatsütsü merang ta tai tongloktsüba tang tashi parnoki magizüker, saka 2021 coup sülen election ajanga shimba ozüng yanglur temi tenzükba

National Unity Government (NUG)-ibo ICJ jurisdiction agizüker aser pelashishia agizüker ta ashi aser taoba mapang ken o nung agüja aliba nung tai apuba ajunga agiener ta ashi.

Ken o jembitsü lia NUG-i sangdong ka agütsüba nung sorkari tamakok ajuruba agizük aser iba yongji kin tilatem anema tashiyim mapa tesashi inyak ta ashi. Parnoki Rohingya tenüng ya agizük, koba Aung San Suu Kyi densema taoba mapang election ajanga shimba sorkari agizüktsü memulungi liasü.

"Iba ama mapa tamajung tanaben meinyaktsü asoshi onoki bendanga agütsür inyaker," ta NUG-i ashi.

Rohingya nunger reshikangshia amshiba nung shilem agi ta tai tonglokja aliba ken o balaka nung Myanmar mitkar lenir Senior General Min Aung Hlaing ya aputsü International Criminal Court-i totuyuba agüja lir.

Myanmar nung noklem lemsar tang elections agiba mapang lir, koba UN aser anüolen linük kari aitsür.



## NZ den asaya atema Washington melen Ayush Badoni shimogo



**Aenjeti/January 12, 2026**

**(Agencies):** India team nungi asayatsü atema yongyaseta imla ataba sülen Ayush Badoni tang mezügbuba India team nung asayatsü atema jaokogo. Pa team nung züngoksemba osang ya Hombarnü metetdaksü aser pai iba osang ya Delhi coach aser taoba mapang India team nungi cricket asayar Sarandeep Singh den lemsatepa liasü.

Washington Sundar melen New Zealand den tanungba

ODI asaya ana atema Badoni ya shimogo. Vadodara nung Deobarnü mezügbuba ODI asayaba mapang Washington tenaret yiruba sülen pa masayatetsüsa kümogo.

"Pa kanga pela liasü aser nia pa atema kanga pelar. Pa team nung züngoksemtsü langa lir. Pai kanga meranga inyakogo. Nisung aikati pa ya pa mulungka nung boundary züka asayaba aser innings talangla asayaba batter ka ama dang meteta lir. Ajisüaka pa ya off-spinner

tajung ka lir aser pai kanga meranga inyakba ajanga pa kanga junga kümogo," ta Sarandeep-i TimesofIndia.com dang ashi.

Badoni-i first-class kanga junga asaya arudar aser pa indang average 57.96 lir. List A format asaya 27 nung pa indang average 36.47 lir.

Badoni-i pa dak team anitsü sempet aliba dena sayuogo. Pa taoba mapang Delhi indang captain mapang inyakogo aser tawa Vijay Hazare Trophy nunga pa Rishabh Pant indang deputy liasü.

"Ni pa dang all-rounder tajung ka kümnera spin bowling nung rangloker inyakba ajanga pa jenjang junga akümtsü ta shiogo. Pai tangbo off-spin kanga junga onteter. Pai ball kanga junga turn süa onteter aser pai bowling tapu ka ana onteter. Pai carrom ball aser arm ball-a onteter. Pa kanga dang tesangra cricket asayar ka lir," ta Sarandeep-i ashi.

Tanabuba aser tasembuba ODI atema India squad:

Shubman Gill (C), Rohit Sharma, Virat Kohli, KL Rahul (WK), Shreyas Iyer (VC), Ravindra Jadeja, Mohd Siraj, Harshit Rana, Prasidh Krishna, Kuldeep Yadav, Nitish Kumar Reddy, Arshdeep Singh, Yashasvi Jaiswal, Dhruv Jurel (WK), Ayush Badoni.

## World Cup nung Bangladesh team atema venue tanga asadanger



**Aenjeti/January 12, 2026**

**(Agencies):** BCCI secretary Devajit Saikia-i ashiba agi, T20 World Cup nung Bangladesh team asayatsüba tesem melenshitsü asoshi International Cricket Council (ICC)-i Board of Control for Cricket in India nem kecha osang agüja mali. Pai ashiba agi iba ken o ya Bangladesh Cricket Board (BCB) aser ICC na tsünga lir.

India aser Sri Lanka na nung T20 World Cup ya February 7 nü nungi tenzüka asayatsü lir. Linük ana tsünga tensa mejungi aliba agi security dak sendakba nung tebilemtsü ka-a Bangladesh Cricket Board-i, par linük team asayatem Sri Lanka-i belener aotsü ICC dang mepeshiogo.

BCB-isa, parnoki ICC nung telangzüba ka agizükogo aser iba ken o ya asadangtsü ta

parnok nem tenangzüka agütsüogo, ta ashi.

BCCI tetuyuba nung Bangladesh nung pacer Mustafizur Rahman IPL franchise Kolkata Knight Riders (KKR) puri chiokba sülen BCB-i tamang makateti aküm. Bangladesh nung nütsüng agi ajema aliba telok amakba indang osang prokshia aoba mapang iba jenjang ya agia liasü.

Kasa mapang nung osang kar ajanga ashiba agi, Bangladesh team asaya atema ICC-i tanga tesem kar asadangdar. Osang ajanga ashiba agi Bangladesh team ya Sri Lanka nungbo masayatsü saka taoba mapang Kolkata aser Mumbai na nung asayatsü lemszüker aliba melen Chennai aser Trivandrum na nung asayatsü akok.

Ajisüaka Saikia-i ashiba agi, iba terenlok dak sendakba nung BCCI nem kecha osang agüja mali.

Tang fixture yanglur aliba nung Bangladesh team ya Kolkata nung February 7 nü West Indies, February 9 nü Italy aser England den February 14 nü asayatsü aser iba sülen Nepal den Mumbai nung February 17 nü asayatsü.

## Milos Raonic tennis asaya nungi anisüngzüker



**Aenjeti/January 12, 2026**

**(Agencies):** Taoba mapang Wimbledon finalist Milos Raonic-i pa tennis asaya nungi anisüngzüksü telemtetba agiba sangdongogo.

Arishi küm 35 tain Canada nung asayar yagi 2016 küm Roger Federer koka Wimbledon final atong, kong pa Great Britain nung asayar Andy Murray-i straight-set nung koka liasü.

Raonic shibai tour-level title ti benogo, pa kasa küm world number 3 tonga asaya. Iba küm pa Australian Open nunga

semifinal tonga asaya liasü.

"Mapang tongogo, ni tennis asaya nungi anisüngzüker," ta Raonic-i Deobarnü social media nung post sütsü.

"Iba mapang ya künü anogobo tonga arutsü ta meteta lir, saka iba atema renema malir. Iba dak talibo ni merenemtsü.

"Kü taküm nung mapang talangbaka ni tennis asaya kanga meima aruogo," ta pai ashi.

Raonic ya service kanga kara oa asayaba atema nüngtugu liasü aser pa dang 'Missile' ta ja liasü. Pa tatensa 2024 Olympics nung asaya aser

iba asayamung nung pa mezügbuba round nung Germany nung asayar Dominik Koepfer-i tsükdakja liasü.

"Kü nükjidong tongteta litetba atema ni ya tia takatiba ta bilemer. Ni anogoshia tajungba akümtsüba dak rangloker inyaksü atema maongka angu aser ni arishi küm ti asüba mapang mezüng asayaba asaya ka asayatsü maongka ngutetba ya tia lir," ta pai shisem.

"Iba asaya ya kü lanuwa kanga tongtibang asaya ka aküm aser ni iba asaya dak dang rangloker liasü aser iba sülen kü profession aser kü taküm aküm," ta pai shisem.

Raonic ya Titograd, Yugoslavia (tang Podgorica, Montenegro) nung aso aser arishi küm asem asüba mapang Canada-i ao. Pai 2011 küm mezügbuba Pacific Coast Championships nung ATP title ka bena liasü.

"Ni anisüngzüka makazütsü. Taküm nung tinyaksü aika lir aser ni 2011 küm ama kasa dang tejangraba aser tetzüraba lir. Ni kechi inyakdir iba mapajia kasadang meranga inyaksü," ta pai ashi.

## Barcelona-i Super Cup 16benbuba kokogo

**Aenjeti/January 12, 2026**

**(Agencies):** Deobarnü Saudi Arabia nung Spanish Super Cup asaya nung Barcelona-i goal 3-2 agi Real Madrid kokogo. Iba asaya nung Raphinha-i tongtibang shilem agia liasü.

Brazil nung winger yagi goal ana idaktsü aser Robert Lewandowski-ia goal ka idakja liasü. Barca-i Super Cup ya otsüsütsüsa 16benbuba kokogo aser Hansi Flick lenisüba nung takok marok pezübuba kokogo. Asaya tatemi Frenkie de Jong red card achiba ajanga team jenjang mejungi aküm saka parnoki takok ngutetogo.

Asaya nung mezügbuba goal ya Raphinha-i minute 36buba nung idaktsü.

Ajisüaka mapang tatsüka dang lir Madrid nungi asayar Vinicius Junior-i tabelen nungi ball bener lua Jules Kounde nem nutmeg ka chidaktsü goal ka idakja liasü.

Iba sülen asaya mezügbuba shilem nung mapang apuloktsü asayaba mapang Lewandowski-i Barca atema tanabuba goal idakja parnok tejakdang aküm, saka ano

mapang tatsüka dang lir Gonzalo Garcia-i Real atema tanabuba goal idakja asaya mezügbuba shilem ya goal 2-2 nung tembanga liasü.

Team ana kanga toktepa asayaba sülen minute 73buba nung Raphinha-i talangka nungi metsüba ball ka Raul Asencio dak tsükdaker Courtois adena ia liasü. Raphinha-i iba asaya nung goal ana idaktsüba densema asaya pongu nung goal tenet idaktsür lir.

Xabi Alonso-i asaya mapang tembangtsü lia Kylian Mbappe yok, saka France nung asayar ya ano temang kangbo junga maküm aser pai kecha temelenshi bener marutet. Asaya nung Mbappe alangdaktsüba atema De Jong nem red card agütsü aser Marcus Rashford-ia goal idaktsütsü maongka anguba ka magiteti liasü.

Iba asaya masaya tsünga Madrid pur asaya pongu tashi khen danga tamakok mongui asaya arua liasü. Alonso Madrid coach akümba sülen tang tashi takok marok ka danga kokteta mali.

## BILEMDANGANG

**"Asüng atema shisabulu agi tanü nü anogo teraksadaktsü."**